



Paneeraq Olsen

Inatsisartunut Ilaasortaq, Naleraq

### § 37 naapertorlugu apeqqutip nr. 098/2023-p akineqarnera

06-06-2023  
Suliap normua 2023 - 14158  
All. nr. 23035476

Asasara Paneeraq Olsen

Postboks 1160  
Oqarasuaat: 34 50 00  
Fax: 34 55 05  
3900 Nuuk  
Email: [pn@nanoq.gl](mailto:pn@nanoq.gl)  
[www.naalakkersuisut.gl](http://www.naalakkersuisut.gl)

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutip uannut akisassanngortinneqarsimasut qujassutigaaakka. Apeqqutip issuarneqarput ataanilu akineqarlutik.

#### 1. Sooruna innuttaasoq paaqqutarineqarnissaminik pisariaqartitsisoq Peqqinnissaqarfimmi uninngasoq, uninnganera ulloq unnuarlu 7.000 kr. missaannik akeqartinneqartoq?

##### Akissut:

*Peqqinnissaqarfimmi sullissinerit atuisullu akiliuteqartarnerat pillugit nalunaarut naapertorlugu peqqinnissaqarfimmi <sup>1</sup>sullissinerimut akiliutit pillugit kaajallaasitaq 17-imi aalajangersarneqartut malillugit unitsitsinermi akilerneqartussaasuni imaluunniit peqqinnissaqarfiup peqqissaaviini unnuiffiusinnaasuni inissinerni allani, uninnganermut ullormut akiliisitsisoqartassaaq<sup>2</sup>. Tassani allassimavoq napparsimasup paaqqutarineqarnissamik pisariaqartitsinera peqqissaavillu uninnganermut ullormut akinut apeqqutaasut. Kaajallaasitaq 17 naapertorlugu paaqqutarinninnermut uninnganermut ullormut akit <sup>3</sup>ataani takuneqarsinnaapput:*

- Paaqqutarisariallit, qitiusumik napparsimmavik peqqissaavillu: 2400 kr.
- Paaqqutarisariaqarnerusut, qitiusumik napparsimmavik peqqissaavillu: 6000 kr.
- Paaqqutarisariallit, Dronning Ingridip Napparsimmavissua: 3000 kr.
- Paaqqutarisariaqarnerusut, Dronning Ingridip Napparsimmavissua: 7000 kr.

Ilanngullugu oqaatigineqassaaq kaajallaasitami § 17 naapertorlugu ukiut tamaasa akit iluarsiiiffigineqartarmata, taamaalillutik nalinginnaasumik akit akissarsiallu allanngorarnerini akigititat malinnaasarlutik<sup>2</sup>.

<sup>1</sup> [Peqqinnissaqarfimmi sullissinerit atuisullu akiliuteqartarnerat pillugit Namminersorlutik Oqartussat nalunaarutaat, Naalakkersuisut, 2006](#)

<sup>2</sup> [Peqqinnissaqarfiup sullissinerinut akiliutit pillugit kaajallaasitaq nr. 17, Peqqissutsimut Naalakkersuisoqarfik, 2017.](#)

<sup>3</sup> Kaajallaasitaq 17 naapertorlugu uninnganermut ullormut akini ilaapput unnuineq, tamakkiisumik nerisaqarneq kiisalu nalinginnaasumik immikkulluunniit paaqqutarinnineq.

## 2. Uuttuutit suut ulloq unnuarlu akigitap naatsorsorneranut tunngaviusarpat?

### Akissut:

Uninngasunut siniffissanut ataasiakkaanut sulisunullu napparsimasumik paaqqtarinittussatut naatsorsuutigineqartunut nalinginnaasumik ingerlatsinermut aningaasartuutitik naatsorsuinerit tunngavigalugit ulloq unnuarlu akinik naatsorsuisoqartarpoq.

## 3. Peqqinnissaqarfinni innuttaasoq paaqqtarineqarnissaminik pisariaqartitsilluni uningasoq ukiumoortumik qassiusarpat kommuunikkaarlugit?

### Akissut:

Ukiut tamaasa nunap immikkoortuini peqqinnissaqarfiup peqqissaaviini assigiinngitsuni paaqqtarisariallit amerlassusaannut tunngatillugu ajoraluartumik automatiskimik paasissutissanik pissarsinissaq ajornarpoq. Paaqqtarisariallit amerlassusaannik naatsorsuinerimi piffissaq tamaat akiligassiissutit tamarmik passullugit misissorneqartariaqarput, tamannalu annertuumik isumalluutitik atuinermut attuumassuteqarpoq aamma § 37-imik akissuteqarnermi sinaakkusiussat avataanniipput. Taamaattorli peqqinnissaqarfiup qitiusumik immikkoortuini 2020-miit 2022-mut peqqinnissaqarfiup napparsimasunit paaqqtarineqartunit isertitai aningaasaqarnikkut naatsorsorneqarsimapput- tabelimi ataaniittumi naatsorsuinerit takukkit.

Peqqinnissaqarfiup qitiusumik immikkoortua	2020	2021	2022
Sermersooq	1.549.000 kr.	1.461.000 kr.	2.577.000 kr.
Avannaa	1.065.000 kr.	52.000 kr.	218.000 kr.
Qeqertarsuup Tunua	2.473.000 kr.	2.604.000 kr.	2.661.000 kr.
Qeqqa	781.000 kr.	1.414.000 kr.	1.796.000 kr.
Kujataa	72.000 kr.	84.000 kr.	76.000 kr.
<b>Katillugit</b>	<b>5.940.000 kr.</b>	<b>5.615.000 kr.</b>	<b>7.328.000 kr.</b>

Inussiarnersumik inuulluaqqusillunga

Med yénlig hilsen



Mimi Karlsen